

1 TESALONICENSES

Yi Jayijp Necy Huidi San Pablo Yajniguejx Je Mibijcpidijc Jim Tesalónica

1 Hich Pablo miid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen iich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugíyigixip.

Je mibijcin huidibi anajty yejcpy iixpejt

²Jabom jabom iich ajcxy nyajnaxyich jäygidaacin ma Dios miid tüg'óciy miich ajcxy ycixpi. Jabom jabom iich ajcxy Dios nmibijctzooyich miid miich ajcxy ycixpi nidüg'óciy. ³Co Dios Teedy nmibijctzooyigixyich, chi njäymeichich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyjäy'ajtin mdungixy etz jadu'n nej mdzojccixy mjihuiygixy mmigügtijc. Nañ jäymejtzpich jadu'n nej miich ajcxy mjijp'ixy jabom jabom co iich ajt nHuindzin Jesucristo xymöhuaangixy it lugar jiiby

tzajpjoty, e ca' mjetmetzciiygixy.

⁴Migügtijc ajcxy, iich ajcxy nejhuiyb co Dios xychojccixy xyjihuiygixy, e nañ iich ajcxy nejhuiyb co Dios ti xyhuin'ijxcixy.

⁵Co iich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcchich, nañ nduunich mijhuinma'n miid Dios yjihui'n ymic'ajt. Jotcujc nduunich ma miich ajcxy. Miich ajcxy mnejhuiyb co tudägy nduunich jigix jëbi mmijpidáaccixipy Jesús y'ayuc ytiy'ajt.

⁶Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigíyigixy iich je n'ijxpejt, e nañ jadu'n ajt nHuindzin Jesús y'ijxpejt.

⁷Co tzaachypí ti mminajxcixy ti myajnajxcixy miid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo

y'ayuc ytiy'ajt. ⁸E jadu'n miich ajcxy ti myejccixy je ijsxpejt miid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijsxpejt ma canaag'it naax cajp. Je mayjäy ti nejhuiydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy iich ajcxy njacyajnimäy je mayjäy jadu'n nej miich ajcxy ti mmibijccixy. ⁹Je mayjäy ma canaag'it naaxcajp ooy ñaymiidmiydäacigixy jadu'n nej iich oy ngogapxäyich miich ajcxy, etz nañ jadu'n nej iich miich ti xycöbäjjccixyich e nañ je mayjäy ñaymiidmiydäacigixy jadu'n nej ti m'ixmajtzcixy yi tzaadzech ojadadii, e ti mbadüdigiiygixy je Dios juugypi janchypi etz tudägypi. ¹⁰Nañ jadu'n je mayjäy ajcxy ñaymiidmiydäacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuin, chona'ñ tzajpjoty. Je huidibi Dios ti yajjugypij co ti y'ögy. Yi' je! je Jesús huidi ti xycohuaanim ma yi mijpi tzaachypi huidibi Dios yquexamyb miid co jäy ajcxy chach pocytungixy.

Pablo ytung huibidi anajty ymiid jim Tesalónica

2 Migügtijc ajcxy, mnejhuiyb ajcxy co ca' ñaadig'i'aty, co iich oy ngapxhuäcxy Dios y'ayuc ytiy'ajt ma miich ajcxy. ²Miich ajcxy mnejhuiyb co jayijp ca'ni anajty nmechich ma miich ajcxy iich ajcxy ooy tzaachypi etz ayo'n ti nyajnajxcixy jim Filipos. Ti jäy xyhuin'ojy xyijp'ojyich. Co

nmejchich ma miich ajcxy, ca' ñejity co tzaachypi ti nminaxyich ti nyajnaxyich jayijp, chi Dios ti xyajjotmicpicxyich, jigix huinmic jotmic ngapxhuäcxibich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy iich jäy anajty xycalixa'ñ xycatzoga'ñ. ³Ca' iich ngapxhuäcxyich anii, ni jibic ayuc, e ni ngamiydägyich jibic ayuc jibic huinma'ñ nej huaad nhuin'lingixy. ⁴Ca' ti nhuin'lingixy. Dios ti xyajni'bicyich co ngapxhuäcxibich yi' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy iich ndung. Jada janchtiy ndumyich jigix Dios jäygidägipy iich ndung. Com Dios yi' ñejhuiyb nej jäy tüg'öciy yjot yhuinma'ñ miidity. ⁵Miich ajcxy mnejhuiyb co ca' nyajxondaaccixy miid ayuc oyjatypi huidi ca' choobaady. Nañ ni ca' iich ajcxy nhuinma'ñ 'ijxtäy nej jëbi iich ajcxy nmeenyaat. E Dios nañ ñejhuiyb co yjanchity jada. ⁶Nañ ni ca' iich ajcxy njijp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxibich yi' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷Oygixy oy'amy ti nduuñich ma miich ajcxy, jadu'n nej tüg ungday miidity y'ung y'anäg miid oyjot oyhuinma'ñ. ⁸Ti iich miich ooy ndzojccixy njihuiygixy, canan jëyi Dios y'ayuc ytiy'ajt ti nmooygixy, nañ naygäyegáanibich anajty ma yi o'cin miid miich ajcxy ycixpi. ⁹Co jayhuin ngapxhuäcxyich

Dios y'ayuc ma miich ajcxy, mjäymejchpy miich ajcxy jadu'n nej iich ajcxy nduun n'ayooyich anajty xiim tzuum miid iich ajcxy ngaayin n'uucin ycixpi. Ca' anajty n'adzibaangixy, paady iich ajcxy nduun n'ayooyich xiim tzuum miid iich ajcxy ngaayin n'uucin ycixpi.

¹⁰Miich ajcxy huidibi mibijcp mnejhuiy ajcxy, e nañ ñejhuiyb Dios, co iich ajcxy ndzinaayich ma miich ajcxy tudägy, huädz iich anajty ajcxy njot nhuinma'n miiididyich. Ca' ma ndundigooyich ajcxy nej pin xy'ocnihuambedipyich ajcxy. ¹¹Mnejhuiyb miich ajcxy nej n'ihuijicxy ngapxhuijicxy etz njotmicmigapxcixy nidüg nidüg, tim jadu'n nej tüg ungdeedy ihuijy capxhuijy y'ung y'anäg.

¹²Ti ngapxhuijicxy co ooy chach copicyity co mdzinäaygixipy nej Dios jëbi jäygidägipy yi mdzinaayin. Com yi' miich ajcxy ti xyhuin'ijxcixy jëbi mdigfiygixipy ma yi' chinaaydac, ma yi' miidity y'oy'ajtin ymij'ajtin.

¹³Paady ycixpi nyajnaxpich jäygidaacin ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxich ma miich ajcxy. Ti mmibijccixy anajty co iich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'n, miich ajcxy huidibi mibijcp. ¹⁴Migügtijc ajcxy, jadu'n ti mjahtcixy jadu'n nej yajty miid je judfojäy huidibi anajty tzinaayb

jim Judea co ajcxy mijpidägy Dios y'ayuc ytiy'ajt, chi je ymigogajp ajcxy ooy y'ixhuidijti ypahuidijti. ¹⁵Je judfojäy ymidziptzoon iich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcaxhiy jecy'ajty. Etz nañ jadu'n ajcxy xyajpidzimyich jim ma ajcxy judfojäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyii tüg'óciy jäy. ¹⁶Yi judfojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yi jäy ajcxy huidibi ca' yjudfojäyity, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy nigi ypocy ñibety ma Dios. Per Dios ti ooy chip y'ejcin pidacy ma judfojäy miid ajcxy ypocy ycixpi.

**Pablo ñijot'ajtp co nicxy
cogapxihuaangixy yi mibijcpidijc**

¹⁷Migüctijc ajcxy, cham hueeni xii tiempo ti ñaxy ma ca' n'oc'ijxcixni ajcxy, per ca' iich miich ajcxy njäydigoy. Ooy iich ajcxy nja'nicxa'n ma miich ajcxy jadüg'oc, e ca' y'oyiy nej iich ajcxy nicxiybich ma miich ajcxy. ¹⁸Ooy iich ajcxy njanicxa'n anajty ma miich ajcxy. E iich, Pablo, ci'm anajty njanicxa'nich mejtz'oc tugiig'oc, e je mujcu' nniiaa ndü'aa ti xy'adujcich. ¹⁹¿Ti mij'ajt miich ajcxy mdijy njijp'ijxpich? ¿Ma mdijy ajcxy nbada'nich njotcujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcujc'ajtin etz oy'ajtin mij'ajtin miid je tiibi

nduunich ma miich ajcxy co ti mmijpidaaccixy Dios y'ayuc ytiy'ajt. ²⁰Miid miich ajcxy ycixpi nmiidich jotcujc'ajtin etz xondaacin.

3 ¹⁻²Miid jada tajin mayin co iich anajty ca' nmimadaga'n miid miich ajcxy ycixpi, paady iich ajcxy nhuinma'n nbidägy co jëbi nhui'ma'nich naydüg jim Atenas, etz jëbi nguexyich iich ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxyi miid iich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy iich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³Jadu'n Timoteo ytunipy ma miich ajcxy jigix ca' mhuinma'nytigooygixip miid je tzaachypi huidibi ajcxy mminajxyp myajnajxyp. Miich ajcxy mnejhuuiyb co copicy myajnaxipy ajcxy tzaachypi miid Jesucristo ycixpi. ⁴Co oga'n n'ijtyich ma miich ajcxy, chi iich miich ajcxy nnimaayich co tzaachypi mminajxcixipy myajnajxcixipy miid Jesucristo ycixpi. E miich ajcxy cham mnejhuuiygixyp co janch tiy'ajt jadu'n nej nnimaaygixy, miid co cham tzaachypi mminajxcixy myajnajxcixy. ⁵Com nejhuuiybich co tzaachypi mminajxyp myajnajxyp ajcxy, paady ycixpi tajpich maybich miid miich ajcxy ycixpi. E com ca' nmimadaga'nich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypaadibich pen tiydudägy miich ajcxy mmibicy. Tzigiiybich anajty co ndiyy je mujcu' ti

xyajhuinma'nytigooygixy, etz jadu'n anajty ñaadig'i'ada'n iich ndung ma miich ajcxy.

⁶Jadachambi Timoteo ti xyñihuimbityich, choon ma miich ajcxy jim Tesalónica, etz ti xyajnejhuuiyich jadu'n nej miich ajcxy mmiidity mmibijcin, etz nañ ti xyajnejhuuiyich jadu'n nej mnaychójcigixy mnayjihuiyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihuiyich, etz nañ ooy miich ajcxy xyja'ixáangixyich jadüg'oc, jadu'n nej iich miich ajcxy nañ jadu'n ooy nja'ixaangixy. ⁷Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicxy tiydudägy yi mibijcin, chi mij ooy ti njotcugiyich. ⁸Jadachambi jëbi njactzinäyich jotcujc, com ti nnejhuuiyich co miich ajcxy ca' m'ixtigihuäccixy ma mmibijcin. ⁹Nyajnajxpich jäygidaacin ma Dios yhuinduu miid miich ajcxy ycixpi, miid co janch jotcujc nayjihuiyijich co miich ajcxy ca' m'ixtigihuägy ma mmibijcin. ¹⁰Xiim tzuum nmibijctzooyich Dios miid tüg'óciy njot nhuinma'nich, jigix Dios xyaj'ahuáatzibich nni'aa ndü'aajich, jëbi nnicxyich ci'm ma miich ajcxy, jaydëbi njacyaj'ijxpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹Njijp'ijxypich co Dios Teedy ci'm etz ajt nHuindzin Jesús xyaj'ahuáatzibich nni'aa ndü'aa jigix nicxy n'ijxcixy

jadüg'oc. ¹²Hich ajcxy ndzojcpy co ajt nHuindzin Jesucristo xyjacmóoygixipy tzojcin jihuiyin, jigix nīgi ajcxy mnaychogiiyb mnayjihuihuiyb miñ xyipy, e nañ nīgi mdzójcixipy mjihuiyigixipy tüg'óciy je mayjäy, tim jadu'n nej iich miich ajcxy ndzocy njihuüy. ¹³Hich ajcxy ndzojcpy co Dios xyaj'ijtip ajcxy mjot mhuinma'n tücc'y ma Jesucristo ytiy'ajt, e ca' m'ixtigihuäccixy, jigix co anajty iich ajt nHuindzin Jesús ymiñ jadüg'oc ya naaxhuiñ miid tüg'óciy je miibjcpidijc huidibi miid huädz yjot yhuinma'n, jëbi miich ajcxy mnayguëxigiiyb ma Dios Teedy yhuinduu miid huädz mjot mhuinma'n, ca' ti xihuin ma Dios miid miich ajcxy.

**Je tzinaayin jugy'ajtin
huidibi Dios yjäygidacyp**

4 Jadüg nax, migügtijc ajcxy, jadachambi may'ajt nbijctzooyich, e nyajniibjccixy miid ajt nHuindzin Jesucristo ycixpi co ajcxy mjaccuychinähuipy Dios y'ayuc ytiy'ajt, jadu'n nej ti nyaj'ixpicich miich ajcxy, etz mjactzinähuipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

²Miich ajcxy mnejhuiiyb je cötujcin huidibi ti nyaj'ixpijccixy. Jada cötujcin iich ajt nHuindzin Jesucristo ti xyajniibicyich. ³Miich ajcxy mnejhuiiyb je cötujcin jadu'n nej Dios tzocy co huädz jot huädz huinma'n myajtúngixipy ma yi mdzinaayin mjogy'ajtin. Ca' huaad mmigapxtigooygixy tüg töxyjäy. ⁴Miich ajcxy mnejhuiiyb

Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ miiddzinähuipy miid oyjot oyhuinma'n. ⁵Ca' Dios jadu'n tzocy co je yëydijc nijot'aty töxyjäy miid jibic-huinma'n, jadu'n nej yi jäy ajcxy y'idich huidibi ca' nejhuiy Dios ytiy'ajt. ⁶Ca' huaad ni pin migapxtigooyi ymigüg ytöxyijc, com Dios yi' tzaachytuniib mijcajee pinjaty migapxtigooyb ymigüg ytöxyijc. Jada cötujcin ti nyajni'ixiiygixy jayhuin. ⁷Com Dios jadu'n ti xyhuin'ijxim jigix oyjot oyhuinma'n ndunim, canan co ndunim jibic jot jibic-huinma'n. ⁸Co tüg jäy ytundigooy miid huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espiritu Santo huidibi Dios ti quexy ma iich ajt.

⁹Miich ajcxy mnejhuiiyb je cötujcin co copicy mdzogipy mjihuihuipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihuiyigix. ¹⁰Janch tiy'ajt jadu'n co miich ajcxy mdzocy mjihuüy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihuiyigixy etz mnayyajmij'ajtigixy mij cajee. ¹¹Jatyim tzinaaygix nicy xeemy, agujc jotcujc. Pidäg ajcxy mjot mhuinma'n ma mgi'mdzinaayin, etz nañ jatyitim naymidúunigix. Jada tiy'ajt ti najtzcapxiyi ajcxy

jayhuin. ¹²Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³Migügtijc ajcxy, ndzojcypich co miich ajcxy mhuinjihuñhuij je tiy'ajt ma je' yajpaady y'alma je migügtijc tiibi y'öccixy, jigix ca' mdájcixipy mmáygixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'n jadüg'oc je tiibi ajcxy y'o'ccixy. ¹⁴Jadu'n nej iich ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'n je öcpidijc huidijaty ajcxy mibijc Jesús.

¹⁵Paady ycixpi iich miich ajcxy nnimaaygixy co ajt nHuindzin Jesús tiy'ajt ti yecy co iich ajt huidibi jacjugy'ajtp co anajty Jesús yhuimbity ya naaxhuiñ, tügmucy xyajnicxaanim miid yi mibijcpidijc tiibi y'o'ccixy. Ca' iich ajt njayijp'adaanim yi tiibi y'o'ccixy, yi' ajcxy jayijp'adamb. ¹⁶Ich ajt nHuindzin Jesús ci'm yhuimbida'n ya naaxhuiñ chona'n tzajpjoty miid ycötujcin, miid ymic'ajtin, e yi' mic capxamb ane'mamb. Huimbidamb Jesús quipxyi miid tüg ángel mijtungmiidpi huidibi nañ jadu'n mic capxamb ane'mamb. E co anajty yhuimbity, chi Dios yaxxuxa'n yi' ytrompeta, e tim huin'ftiy Jesús xyajpidictähuaanim ya naaxhuiñ, e chi ajt naybadaanim miid Jesús jocjoty. ¹⁷E chi iich ajt huidijaty anajty jactzinaayim, naybadaanim miid ajt nHuindzin

Jesús jocjoty quipxyi miid je'ajcxy huidibi anajty ti yjugypicy jadüg'oc. E jadu'n ndzinähuaanim huinixii huinitiempo miid ajt nHuindzin Jesús. ¹⁸Miid jada ayuc tiy'ajt nayyajjotcugüiyigix miñ xyipy.

5 Migügtijc ajcxy, ca' ycopicity njacnijayíygixipy jadu'n nej je xii je tiempo yca'pxa'n. ²Miich ajcxy mnejhuiyb co iich ajt nHuindzin Jesucristo yhuimbida'n ya naaxhuiñ tzaachytuna'n yi mayjäy miid ypocy ycixpi. Jesús miinaamb mina anajty je mayjäy ca' ti ocjijp'ijxni. Jadu'n ymiina'n jadu'n nejjihuüy tüg meetzpi ymiñ coodz co ymeedza'n. ³Co anajty je mayjäy yminaangixy: “Cham ooy jotcujc ndzinaayim, ca' ma tzip capxy”, chi timitiina jotcömoñi Dios yajtigoya'n je naaxhuiñyi. Timitiina ayo'n ñimiiniyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'n. E ni pin huaad cacöguëgipy je tzaachypi co Dios anajty ymiñ ya naaxhuiñ yajtigoydähua'n yi mayjäy. ⁴Per migügtijc ajcxy miid miich ajcxy Dios ytiy'ajt, paady miich ca' jadu'n myajpáatcixni nejjihuüy mdzinaaygixy agootztuuby. Ca' ajcxy mgixípy mgüedípy mina anajty Jesús miñ jotcömoñi, jadu'n nej jäy nigoobi ycixy ycuency co ti ymeechyii. ⁵Com tüg'óciy miich ajcxy Dios y'ayuc ytiy'ajt mhuinjihuüyigixy, jadu'n nipaady jadu'n nejhuiy ti mgoximíygixy ti mgodiicxíccixy. Ich ajt ca' njacyajpaatim agootztuuby. ⁶Paady ycixpi ca' huaad njäydiigooyim Dios

ytiy'ajt, ca' huaad nmi'öctigooyim
 jadu'n nej yi jacjaydyii jäy ajcxy
 huidibi ca' cuendituñ Dios y'ayuc
 ytiy'ajt, jadu'n yi' ajcxy nipaady
 jadu'n nejjihuüy ajcxy ti ymi'öctigoy.
 Ijtcix ni'ixi miid tüg'óciy Dios
 y'ayuc ytiy'ajt. Mi'ijtcix huijy cujc
 mjot mhuinma'ñ. ⁷Yi jäy ajcxy
 huidibi maab, coodz ajcxy ymäy.
 Yi jäy ajcxy huidibi muucip, coodz
 ajcxy ymúucigixy. ⁸Ich ajt huidibi
 nnejhuüyim Dios ytiy'ajt, copicy
 huijy ycuje ajt ndzinaayim, e nañ
 copicy nmibijcim Jesucristo e
 nañ naychócgix nayjihuiyigix
 miñ xyipy, jadu'n nipaady nej
 soldadtijc ñaygohuáanigixy miid
 pujx huidibi ymiid ma ycaach.
 E miid co njjip'ijxim co Dios
 xyajnidzögaanim ajt n'alma, jadu'n
 nipaady nejjihuüy soldadtijc
 ñaygohuáanigixy miid ypujxcöjup.
⁹Com Dios xyajjugy'ajtim
 co xychaachytunaanim
 xyajtigoyaanim, Dios xyajjugy'ajtim
 nej n'alma jëbi paatim nidzoocin
 co nmijpidaacim ich ajt nHuindzin
 Jesucristo. ¹⁰Jesucristo ti y'ögy
 miid ajt nbocy ycixpi, jigix jëbi
 huaad ndzinaayim jiiby tzajpjoty
 quipxyi miid yi', ca' ñejity pen ti
 anajty n'o'cim o pen jiini anajty
 njugy'ajtim co anajty Jesucristo
 yhuimbity ya naaxhuiñ. ¹¹Paady
 ycixpi jacnayjotmicmigápxigix, e
 nañ jacnaybubéjtigix nidüg nidügti,
 tim jadu'n nej cham mdungixy.

Pablo capxhuijy yi mibijcpidijc ajcxy

¹²Migügtijc ajcxy, may'ajt
 nbjctzooybich co yajmij'ajtcixy
 ajcxy yi migügtijc huidibi tumb ma
 miich ajcxy miid Dios y'ayuc ycixpi.

Yi' ajcxy huidibi xyajni'ixiiyb
 Dios y'ayuc ytiy'ajt, yi' ajcxy
 xycapxhuijip miid ajt nHuindzin
 Jesucristo y'ayuc ytiy'ajt. ¹³Copicy
 myajmij'ajtcixipy ooy, etz nañ
 mdzójcixipy miid je Dios ytung
 ycixpi huidibi ajcxy ytumyb ma
 miich ajcxy. Tzinaaygix jotcuje ca'
 ma tzip capxy.

¹⁴Nañ jadu'n, migügtijc ajcxy,
 nyajni'bijcipy ajcxy co myaj'ojip yi
 migüg ajcxy huidibi ca' ti dung
 tuna'ñ, etz nañ mjotmicmigapxip
 huidibi ajcxy tajp maayb, etz nañ
 mbubedipy ajcxy huidibi hueeni
 miid ymibijcin, etz yajtungix
 mecxtujcin miid tüg'óciy migügtijc.

¹⁵Ich miich ajcxy nimaayb co
 ca' ni pin huaad yaj'ahuimbidity
 jibic ma ymigüg huidibi ti
 ymidundigoyii. Nañ jadu'n
 nimaaygixy co naymi'oyjäy'ajtigix
 nidüg nidügti. Nañ jadu'n
 oyjäy'ajtin mdunipy ajcxy miid
 tüg'óciy naaxhuiñyäj.

¹⁶Jatytim miid'ajtcix jotcuje'ajtin
 jabom jabom. ¹⁷Capxtaaccix etz
 mibijctzoogix Dios jabom jabom.
¹⁸Yajnajxcix jäygidaacin ma Dios
 pen ji ajcxy mjahtcixy ayoogixy
 nejaty, com Dios ooy yjotcuje'ajtin
 je migügtijc huidibi mibijcp Cristo
 Jesús yajnaxy ajcxy jäygidaacin
 ma yi' jabom jabom miid tüg'óciy
 huidibi tuunip jajtíp ma yi' ajcxy.

¹⁹Capxymidoogix je Espíritu
 Santo, co ngacapxymidoohuim
 je Espíritu Santo huin'it
 nyajtigooyim Dios yjihuiñ
 ymic'ajt huidibi yajpatp ma ich
 ajt. ²⁰Yajjotcuje'ajtcix huenpinity
 pin Dios y'ayucpidzimb ma miich
 ajcxy. ²¹Jëyi janchtiy m'ixipy

peni quipxyiiyb miid Dios
y'ayuc huidibi ajcxy ycapxyp.
Mijpidaaccix je ayuc tiybi.

²²Ixmajtcix tüg'óciy jibic ayuc
jibic-huinma'n.

²³Dios nmibijctzooybich, je
Dios huidibi yejcpy jotcuje'ajtin,
co ajcxy xyajhuaatztaayip mjet
mhuinma'n ma yi jibicpi. Dios
nmibijctzooybich co yi' ci'm
xycuendi'ajtip huädz oy yi
m'alma ajcxy, etz yi mjihui'n, etz
mnïcx mgohuajc, ca' ma pocy
yquëxgy, ixti mabaad anajty iich
ajt nHuindzin Jesucristo ymiiñ
ya naaxhuiñ. ²⁴Je Dios huidibi
ti xyajmibijccixy, tudägy yi', e

ycuydunipy yi' y'ayuc miid miich
ajcxy.

Capxpooxñin huidibi cijxnip je necy

²⁵Migügtijc ajcxy, mibijctzoogix
Dios miid iich ajcxy ycixpi.

²⁶Naygapxpóocxigix xic xon
nidüg nidüg miid oyjot oyhuinma'n.

²⁷Nhuindzin Jesucristo ajt ti
xyajnibicyich jada tung, paady
nyajnibijccixy co jada necy
mgápxcixipy ni'abidzimy ma
tüg'óciy mibijcpidijc.

²⁸Dios nmibijctzooybich co
iich ajt nHuindzin Jesucristo
xyconuucxip ajcxy. Jadu'n jada.
Amén.